



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Russia madak takok angutsüla saka mesamatsütsüla: Macron

Iga Swiatek-i Qatar Open kokogo



VOL. XX NO. 129 (ADOK 129) DIMAPUR TENTONÜ (MONDAY) TSÜKLAI (FEBRUARY) 20, 2023 ₹ 5.00

Indisen yimten aser DAYO-i aitsür

Dimapur, Feb.19 (TYO) : Indisen yimtak February 18 aonung Lok Janshakti Party (Ram Vilas) telok yarirtemi nübertem jashitsüsa ozüing anema inyakba mapatem sashia aitsür ta tanü yimten sangdong ka ajanga Indisen Village Council-i metetdaksüogo.

Yimten dang nungi temelaba magii tangar shinga yim telong nung election dak aketba mapatem inyaksü memelar ta Indisen yimtenisa metetdaksü. "Indisen yim ajaklen mitkartemi mita anüksü aser yangi sangdongba ozüing alema inyaker dak langka danga atalokra yimten khuret masütsü," ta Indisen Village Council-isa metetdaksüogo.

Dimapur kübok Indisen yimtsüing ya yimjung aser putepa aliba yimtsüing ka lir saka February 18, 2023 aonung political party züingsem kari tenüing menük bentsür aruogo ta Dimapur Ao Youth Organisation

(DAYO)-i tanga sangdong ka nung ashi.

Nagaland nung election code of conduct ozüing agüja lir saka political party züingsemtemi Dimapur 2 constituency nung candidate aliba yimtsüing telungi ai. Idangji Indisen Village Council-i yimtsüing nung tensa reprangshimtsü atema tashi agüja aliba Indisen Youth Organisation lennirtemi parnok den asüingdangtep dang tatemtsü kar agütsü, ta Media Cell, DAYO-i ashi.

Nagaland nung election tiptema aser ochishia agütsü atema renemba mapang ka nung iba amai tensa raksatsüsa mapa inyakba ya Nagaland state ajunga mezüingmeshiba ka lir. Indisen Lanur Telongiem-i ashiba nung DAYO-i pusema nungiter aser kija mesüra teloki ozüing alema mapa inyakbatem Ao sobaliba aser ozüing nung lateta aliba ama merenshütsü, ta DAYO-isa metetdaksü.

Meghalaya sorkari PM Modi indang sentong agütsü memelar

Shillong, February 19, 2023 (Agencies): Meghalaya nung NPP aser BJP tsüingda toktepa arur aser BJP-i Conrad Sangma-i aniba Meghalaya sorkari BJP nüboyimba nung tetsükdaksü agütsür ta tai tongloksüogo.

February 24 nü Tura nung aliba PA Sangma Stadium nung sentong ka nung PM Narendra Modi

arutsü memelaba atema BJP jashir. Iba stadium ya state sorkari ketdangsia repranger aser iba atema political party ana tsüingda kanga o atsüteper.

"Meghalaya sorkari Tura nung Prime Minister Narendra Modi indang election rally agütsü temelaba magütsür" ta Meghalaya BJP State President Ernest

Mawrei-i ashi.

Union Home Minister Amit Shah-i tawa Tura semdangba sülen National People's Party (NPP)-i tenokdangba agütsür ta BJP-isa ashi.

February 24 nü PM indang sentong agütsü atema BJP-i temelaba meshi saka Meghalaya state sorkari ibaji magizük.

BJP-i media nisungtem merenshiba magizüker: NPA

Dimapur, February 19, 2023 (TYO): February 18 nü BJP-i osang tai agütsüba dang masü saka media nisungtem dang o tamajung ashiba aitsür, ta Nagaland Press Association (NPA)-i metetdaksü.

BJP ama political party kati media nisungtem dang iba amai yimya tamajung sayutsüba kodanga mebilemi liasü ta NPA-i ashi.

NPA-i maneni fourth estate

kümzüksü aser nisung shinga nema fourth estate akhüm mezüingmeshi mesükdaksütsü ta BJP dang nenshia metetdaksür, ta Nagaland Press Association-i metetdaksü.

KU-i Amit Shah'er rally nung adentsü tetuyuba agütsü

Dimapur, February 19, 2023 (Agencies): February 20, 2023 nü Mon Town Local Football Ground nung Union Home Minister aser BJP lenmir Amit Shah indang sentong nung Mon jila nung alir ajak adentsü atema Konyak Union-i Honibarnü tetuyuba agütsüogo.

"Mon district nung aliba senso ajaki iba sentong nung adentsüla. Political party, kin, kidong aser tamangba yimsü telemsa kecha melii nisung ajaki iba sentong nung adentsüla" ta Konyak Union-i ashi.

Iba sentong nung Union minister Amit Shah nungi

indangindanga osang angashitsü aser India sorkari Eastern Nagaland atema sentong atongba metetsü, ta Konyak Union-isa metetdaksü.

Iba sentong nung Mon district nung alirtemi pei pei kin sobutsü agir arutsü metetdaksür ta parnokisa ashi.

NATIONALIST DEMOCRATIC PROGRESSIVE PARTY (NDPP)

Facta non Verba

- SUSTAINABLE DEVELOPMENT
- EMPLOYMENT GENERATION
- ECONOMIC GROWTH



NAGALAND - TOWARDS A STATE OF EXCELLENCE



PUBLISHED BY : NDPP MEDIA & COMMUNICATION COMMITTEE.

FOLLOW US @NDPPOFFICIAL

" Tangar Vote rakzüka ajenbaji pei chirnur tarutsü tia ajensatsür ta metetdi Anonymous

- Ungma Baptist Arogo Laishir Telongiem Clean Election Tayongzükba

Nagaland Governor tasenba Kohima tongogo



Chief Minister aser pa den külem tenzüker, Chief Secretary, DGP Nagaland, Home Commissioner aser ketdangsürtemi February 19, 2023 nü Raj Bhavan, Kohima nung Nagaland Governor inyaksü shimteta alisang La Ganesan agizüka liasü.

Dimapur, Tsüklai/February 19 (TYO): Nagaland asoshi Governor tasenba La Ganesan, February 19, 2023 nü Raj Bhavan, Kohima tonga aruogo. Pa arua atongba mapang yimsü nung aliba ama

Nagaland Police Mahila (IR) ajanga Guard of Honour agüja agizüka liasü. Pa ya Raj Bhavan, Kohima nung Chief Minister aser pa den külem tenzüker, Chief Secretary, DGP Nagaland,

Home Commissioner aser danga ketdangsür temi pela agizüka liasü. La Ganesan ya February 20, 2023 anepdang 10:00 ako nung Raj Bhavan, Kohima nung tezüngzüktep agitsü.


Dimapur nung mejangjaba nisung tasü mang ka nguteta lir

Dimapur, Tsüklai/February 19 (TYO): Railway Bazaar, Dimapur anasa Platform No. 05 nung railway track tezülen February 18, 2023 nikongdang 5:00 ako meta arishi küm 50 shi tain mejangjaba nisung (non-local tebur) ka tasü aliba ngutet,

ta sangdong ka ajanga ashi. Iba nisungba ya tula talang sentsü temesung aser long pant sentsü tanak semer liasü. Ozüing agi melaba maparen ajak tembangba sülen PM examination/jangjatsü asoshi tasü mang ya Dimapur District

Hospital nung bener oa lir. Kibur/kinunger/tembar temi Officer-in-Charge, Govt. Railway Police Station, Dimapur (Mobile No. 7085055021) den tongterateptsü metetdaksür, ta sangdong ajanga ashi.

Pranabananda Women's College nung SVEEP sentong agi



Dimapur, Tsüklai/February 19 (TYO): SVEEP (Systematic Voters' Education and Electoral Participation) dak sendakba nung Integrated Communication & Outreach sentong ka February 17 nü Pranabananda Women's College, Dimapur nung agiogo. Iba sentong ya Central Bureau of Communication Ministry of information and Broadcasting Field Office Kohima aser IQAC, Pranabananda Women's College, Dimapur na longjemmer ayongzüka agia liasü. Sentong nung Dimapur Deputy Commissioner, Sachin Jaiswal, IAS-i ashiba agi,

Nagaland nung election agitsü ana nung aliba mapang chief electoral officer nungi tenzüker DC, SP, aser Commissioner of Police densema state sorkar ketdangsürtem ajak Election Commission of India tetuyuba nung inyaksangshidar. "Election Commission of India nungi kechi tetuyuba sa agütsüdir ajakji shita benoka inyaksü atema onok idaki lir aser voter tem pei vote ochishia sadem sadema vote agütsüdaktsüta tenanzükba agütsür," ta pai ashi. Paisa, lanur voter tem ya the prime voter tem lir aser parnok tarutsü atema vote agütsüta temsüa alirtem lir, ta

ashi. Pai, Lhomithi colony nung aliba nübortem dang tejakdangi arua vote tali agütsüta ajungshi, kechiyong taoba election nung vote agütsürtem shilem 58 dang liasü, ta ashi. Iba sentong ya Asst. Professor Olivia Kikon lenisüba nung agi aser Joint Secretary PWC Swamiji Chinmoyanandaji Maharaj-i lokti pela agizükba o jembi aser P. Sophie-i tepela o jembia liasü. Sentong nungsa Pranabananda Women's college aser Cultural Troupe-i ken aser saya balala saya liasü. Maneni jepdak o jembiba tetoktepa nung takok angurtem nem tetushi agüja liasü.

BJP-i nübortem terata nung yutsünür: Jairam Ramesh

Dimapur, February 19, 2023 (TYO): BJP-i yimten latettsü atema election yimyim agütsüba ya nübortem tsüingda terata adokdaksütsü atema lir ta Congress lennir Jairam Ramesh-i ashi. "Nagaland Chief Minister Neiphiu Rio, Prime Minister Narendra Modi aser Union home minister Amit Shah nung dang 13 buba Nagaland Legislative Assembly mapang kechiba Naga yimten melatet ta ni asüingdang" ta Jairam-i ashi. "BJP-i yimten melatetnür kechiyong parnoki atangji Naga

yimten latettsü bilema lira inyakadoker lila. Parnoki thinentüsü aser osang tejangja mashitsü ang jangar" ta paisa ashi. Nagaland nung alirtemi nenok dak tamang akatsü atema BJP central lennirtemi shitakba onüktem jembiang. Naga loktiliba jenjang nung ajemdaker Naga yimten latettsüla, ta Jairam-isa metetdaksü. "Prime Minister aser Union Home minister nati Naga nung dang Arrla 371 (A) nung mekongshitsü ta tenanzükba agitsüla" ta paisa ashi.

Northeast Democratic Front indang manifesto sayaogo



Dimapur, Tsüklai/February 19 (TYO): Northeast Democratic Front puri par party indang manifesto February 18, 2023 nü saya liasü, kong party tir Lima Longkumer den executive züngsem temi anir ketdangsürtem dena liasü. Iba manifesto sayaba sentong nung Meghalaya aser Assam unit nungi züngsemtem dena liasü. Par party manifesto ya parnok indang "Power to the People" omen nung ajemdaker "Justice, Unity, Progress aser Development" nung rangloker yanglua lir. Northeast Democratic Front indang manifesto nung itemi tongtipangsa agüja lir: 1. Private sector-i aniba rongsenketzüing indaksüba

- sector nem teyari agütsütsü;
- 2. Ki-o-jen agütsütsü, a m s h i d a k t s ü t s ü , yanglushitsü aser anepalutsü;
- 3. R o n g s e n k e t z ü n g ajungkettsü asoshi mera agitsü aser employment adokdaksütsü;
- 4. Yimdak-yimtsüing nung small-scale, micro aser cottage industry tem amenoktsü ajungmesotsü;
- 5. Tetsür nem tashi temeden agütsüdaktsüba nung asangsang kuma inyaksü atema tetsürtem indang lokti tentet tashi itshidaksütsü;
- 6. Yimdak-yimtsüingtem nung pei sasa pei peria aluyimba nung yaritsü.

Chumoukedima aser Niuland district tem nung training tasembuba agitsü

Dimapur, Tsüklai/February 19 (TYO): Chumoukedima aser Niuland district tem nung 14th Nagaland Legislative Assembly, 2023 atema aruya aliba General Election dak sendakba nung Presiding Officer, 1st Polling Officer, 2nd Polling Officer aser 3rd Polling Officer ama shima aliba ketdangsür/staff ajunga dang tsüinglanglen agüja aliba ama training round tasembuba nung adentsü metetdaksü: 4-Ghaspani-I atema Presiding Officers, 1st Polling Officers, 2nd Polling Officers aser 3rd Polling Officers training ya February 22, 2023 anepdang 10:00 ako nungi anüingdang 12:00 ako tashi GHSS, Chumoukedima nung agitsü. Grade-IV atema training ya anüingdang 12:00 ako nungi kasa tesem, GHSS, Chumoukedima nungsa agitsü. 5-Ghaspani-II atema Presiding Officers, 1st Polling Officers, 2nd Polling Officers

aser 3rd Polling Officers training ya February 22, 2023 nikongdang 1:00 ako nungi 3:00 ako tashi GHSS, Chumoukedima nung agitsü. Grade-IV atema training ya February 22, 2023 nikongdang 3:00 ako nungi kasa tesem, GHSS, Chumoukedima nung agitsü. Tanüingba Reserves ajunga atema training ya February 22, 2023 nikongdang 1:00 ako nungi 3:00 ako tashi GHSS, Chumoukedima nung agitsü. Polling Personnel ama shima aliba ketdangsür/staff ajak Election Commission of India atema deputation nung alitsü aser Election Commission of India tazüokba, tawabangba aser yimya nung alitsü. Chumoukedima aser Niuland district kübok aliba Head of the Department ajak dang pei department nungi shimteta aliba ketdangsürtem iba training nung dendaktsütsü totuyuba agitsüogo.



India nung Khristantem anema inyakba tatalokbatem kanga bulua akümba anema February 19, 2023 nü Jantar Mantar, New Delhi nung tongti putir, Anil Joseph Thomas Couto leniba nung Khristantemi longkak aitba noksa nung angur.

March 3 nü Delhi nung Quad foreign minister tem senden amentsü

New Delhi, February 19 (Agencies): Taruba ita G20 linüktem nungi foreign minister tem senden amenba sülen Quad linüktem nungi foreign minister tem-a senden amentsü.

March 3 nü Delhi nung India foreign minister, S Jaishankar-i Australia, Japan aser US nungi foreign minister tem - Penny Wong, Yoshimasa Hayashi aser Antony Blinken nunger den senden amentsü, ta ketdangertemi metetdaksü.

March 1-2 anogotem nung G20 senden nunga minister 3 jagi shilem agitsü. Iba senden nungji Russia aser China nungi

foreign minister tema adentsü. Indo-Pacific Region nung China linüki ambangyima inyakba mapang nung Quad linüktem nungi foreign minister tem senden amentsü aser taküm Australia nung Quad summit nung jembitsü onüktema parnoki asadangtsü.

March 8 nü Australia Ato kilonser, Anthony Albanese-i Delhi semdangtsü aser Ato kilonser, Narendra Modi den senden mena Quad summit densema onük balala nung o lemteptsü.

Yaküm Quad foreign minister tem senden amenba

sülen parnoki külem sangdong ka ajanga, Quad-i nüchiso, ozüng aser democracy ajungkettsütsü atema inyaker aser yimjung nung ken otem bentettsü aser linüktem litsü akhümtsübuba ajungkettsütsü atema inyaker, ta metetdakja liasü.

Russia-i Ukraine amakba atema India dak alaka tanünga Quad linük asemibo Russia aitsüogo; Quad foreign minister tem senden nungji talisa Indo-Pacific region atema jembitsü saka Ukraine tensa atemabo mejembitsüa akok.

Shiv Sena nungja atema sen cr. 2000 tezüngzüktep agi: Sanjay Raut



Mumbai, February 19 (Agencies): Amongnü Shiv Sena (Uddhav Balasaheb Thackeray) lenir, Sanjay Raut-i, Shiv Sena party tenüng aser 'lasang' temaitsü alizüktsü atema sen crore 2,000 tezüngzüktep agiogo, ta aitsü.

Ajisüaka Maharashtra Chief Minister, Eknath Shinde-i aniba Shiv Sena telok nungi MLA, Sada Sarvankar-ibo ibaji aija, "Sanjay Raut ya cashier asü?" ta asüngdang.

Sanjay Raut-i tweet ka

ajanga, sen crore 2,000 zünyaji mezüngbuba dang lir, aser iba osangji tejangja, ta metetdaksü.

Raut-isa osangbenertem dang, Eknath Shinde-i aniba sorkar den tesendaktep junga alir kati iba osangji pa den lemsatop, ta metetdaksü.

Rajya Sabha MP, Sanjay Raut-i, pai jembiba oji pusema pa ket nung kuli lir, aser kobi melii pai ibaji jungkai adoktsütsü, ta metetdaksü.

Commission-i Eknath Shinde-i aniba telokji ang shidakba Shiv Sena telok lir, ta shia party temaitsü 'lasang' amshitsü temeden agütsü.

Election Commission-i Uddhav Thackeray telok nem state assembly by election mapang tashi amshia aliba "milen" temaitsü agütsü.

Raut-i twitter ajanga, "Shiv Sena tenüng aser temaitsü atema sen crore 2,000 tezüngzüktep agiba osang tejangja ni nguogo. Kobi melii ano osang aika jungkai adoktsütsü. Linük puti otsü nung kodanga yamai matalokdang," ta metetdaksü.

2019 küm Maharashtra assembly election osang sangdongba sülen Shiv Sena-i BJP den teloktep raksar Uddhav Thackeray-i NCP aser Congress na den Maha Vikas Aghadi (MVA) teloktep yanglua sorkar aküm, ajisüaka yaküm Shinde-i party anema apusoba sülen sorkar chirepa liasü.

Onok medenibo opposition longjemtsüji tamakoktsü: Congress

New Delhi, February 19 (Agencies): Tan hopta Congress party plenary senden alitsü jakdang Amongnü Congress-i, anogo asemnü senden nung party nung bangdak lenirtemi taruba Lok Sabha election atema opposition longjemtsü asoshi o lemteptsü; Congress mendenibo opposition longjemtsüji tamakoktsü, ta metetdaksü.

Chhattisgarh kübok Nava Raipur nung February 24 nungi plenary senden tenzüktsü aser anogo asemnü senden nungji tejaoker 15,000 shi adentsü.

Congress general secretary organisation, K C Venugopal-i, mezüng anogo nung party steering committee senden amentsü aser party nung telemtetba agiba Congress Working Committee (CWC) election agitsü asü magitsüar telemtetba agitsü, ta metetdaksü.

Paisa, 2024 küm Lok Sabha election jakdang opposition party tem teloktep atema Congress-i koba shilem agitsüar meteta dang lir, ta metetdaksü.

Delhi nung osangbenertem senden ka nung jembidang Venugopal-i, "Congress-i ketdangsüa iba maparen tenzükogo aser party aika den

tongtepratepdar. 2024 küm election nung BJP anema tokteptsü atema onoki ketdangsüa opposition party tem longjemtsü," ta metetdaksü.

"Party plenary senden nung opposition telongjem atema o lemteptsü. Tongti mapaji 2024 küm BJP tamakok ngudaktsütsü atema lir," ta paisa metetdaksü.

Congress general secretary communications, Jairam Rameshia, opposition longjemtsüji tongtibang, ta Congress-i meteta lir aser plenary senden nung iba atemaji jembitsü, ta ashi.

"Shingaia onok (Congress) nem iba atemaji certificate ka agütsütsü menüngdak, kechiyong onoki lenitsüla. Congress mendeni opposition longjemba ajanga tamakok dang angutsü. Anungji Nitish Kumar (Bihar Chief Minister)-i jembiba oji onoki pelaa agizüker," ta metetdaksü.

Honibarnü JD(U) lenir aser Bihar Chief Minister-i, opposition party tem longjemtsü atema Congress-i ketdangsüa inyaksüla, ta jembia liasü.

Ramesh-i, "Aji masüdag assembly elections aika lir. Congress tashi meitra opposition telongjemji tamakoktsü," ta ashi.



February 19, 2023 nü Jammu nung aliba People Democratic Party headquarters nung Jammu region kübok district aser zonal Tirtem senden nung party Tir aser taoba mapang Jammu & Kashmir chief minister, Mehbooba Mufti-i jembidang tangokba noksa nung angur.

Office of the
Khar Village Council
P.O. Mangkolemba, B.P.O. Khar
Mokokchung : Nagaland
Khar Putu Mendeni aitsür
 Dr. Longrinuken LJP candidate 29th Jangpetkong A/C declaration 16th Feb. 2023 anogo Warumong public meeting nung Mr. Sashimongba Walling (Khar) ajanga 29th Dec. 2022 senso mungdang mekatetdaksü ta jembibaji pa meten o jembiba dang ta Khar Putu Menden ajanga aitsür. Tarutsü nung Khar Putu Menden anema tim masüba jembishinü aser inyaksangshi ajitetra sobalibai melaba ama tapet tasüngdangba alitsü.

Sd/- SASHIKABA Chairman Khar Village Council	Sd/- WATITOSHI Secretary Khar Village Council
---	--

LANGPANGKONG KAKETSHIR MUNG DANG

CLEAN ELECTION YIMYIM KA AYIMOKTSÜR

Nagaland nung tang agitsü aliba election ajanga Election Commission of India-i latettsüba ozüng aser inyakyim nung ajemdaker, Naga nübor lenitsü asoshi tetemsü nübo shimtsüba mapa nung tashiyim agi masü saka ochishia pei tangatetba nung pei meyongnem tashi amshia ajaki shilem tajung agi tsü aj angajanga ayimoktsür.

- Langpangkong Kaketshir Mung dang.



Estd. 1948
"Unity"



TIR YIMYIM YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 20, 2022

Policei police miter

Nagaland nung kodanga mangashidang aser mengudangba mapa tajung ka, tang election mapang inyaka angubaji Nagaland police-i Nagaland police dak temulung malem Nagaland police gari-tem len tom nung soita mitba mapa ya asütsü. Ibaji Nagaland shirangba tashidak tuluka puteta operation agi tenzüker amai bilemer. Atangji, Nagaland nung yi yanglutsü aser ayoktsü memelar, drugs bener arua ayoktsü bajibo otsü maka. Ajisüaka, Nagaland kinük-kisang ajaklen sali moko aser tajemtzü tzü ayokdak ajak nung yi angur aser drugs-a talubo angur asünungji lanurtem aika taküm raksadagi. Ibaji tachitajemer aliba kija agi masü saka ozüng raksaba mapatem miter mitkartem pei mapa nung menendak aser majangba dang masü saka parnok teyari ajanga shibelendaktsüba ajanga lir. Aji oda, police-temi süngküm nung mittsü melen police-temiang police gari nung yi aser drugs shibelenra alimai atitsüba masü. Iba limajibo raksaogo ta bilemdi aser aji asen lima. Naga nunger ajak ya Khristan lir saka ajakbo Khristan tajung masü, sen dang ngura Yihuda Iskariot amato Yisua ayoktsü renema dang lir. Iba jagi, Nagaland police gari nung, sen dang ngurbo ta ser yi aser drugs bona alitsüa akok. Ano, iba dakji tali sen dang meshir khu abenba gari tulu nung yi sünga oshir check gate ajangdakja alitsüa akok. Iba amajika masü nungbo Nagaland telongi yi aser mozü bener aita, tang amai sademsadema meyoktettsü. Ano, Nagaland nung alir nübortem asoshi lendong kaji, police department nung retire ser alirtem aikati pei mapa nungi manendang amshiba gari government nem meyipa magütsü tang teinyakdak police officer amai police gari amshir. Item jagi, iba tashi nung ozüngi memelaba mapa kwikabo inyaka alitsü? Tanü asüng nübortem asoshi police station ya lendong aser timtem mapang tejenokdak aser teyari meshitak masü saka timtem angudak tesemang ka kuma odagi, iba jagi timtem mapang nung police dak jenoktsü melen police nungi ajentsüsa akümer. Iba tiaji tang ama police tanishir tajung alidang shisadanga shisalemsatepa tajungba akümtsü ajungshiteptsüla. Aji oda, tang ama election mapang nunga, candidate meyong sen crore ta beshitsüba kanga tasak, anungji police gari nung police nem bendaktsüsbajiang takoktsü lenmang tajung ka lir ta nisungtemi apiteta inyaka alitsü. Iba dang nungi tali ano Nagaland police dak temulung melemtettsüsa aliba mapa tulukaji tang ama, election mapang taila police aika yanglur taila police gari nung nisungtem tsübudakja mapa tamajung inyaka senzütsüa akok. Nagaland ama ka nungbo item ajakji takoktsü, kechiyong Nagaland ya temzüng ozüng agi masü saka tashiyim aser sen agi yimsü asüba aser ketdang asüba lima ka kumogo. Aji oda, mitkartemi meiner jajaba yimsüsürtem gari nungang yi aser sen bener jajara, itemji shibai mittsü? Iba amaji ozüng yanglurtemiang ozüng raksaba aser mitkartemiang ozüngi memelaba mapatem inyakba limaji Nagaland ser talangka aruogo. Aji oda, Nagaland yabo tema tereprangtsü nung dang ozüng yangludak assembly ali ama sayur aser tenüng agidang mitkartem lir ama uniform semer sayur dang ashi, oh! Nagaland-bo pei sünütsü sütetba aser inyaknüttsü inyaktetba lima ka kumogo. Iba amaisabo talangka moutettsü. Iba ama teraksa tia ka nung, Nagaland police-i Nagaland tajungba kuma yanglushitsü asoshi parnok dak nungi tama tenzükbaji junger. Aji oda, kodang nübortemi Nagaland police dak temulung lemtet tenzükdir, aji Nagaland shia arur asütsü. Idangjibo timtem nung nübortemi Nagaland police dang nungi ajentsü melen Nagaland police bushitsü. Nagaland nung iba ama anogo tasen aser tajung kaji taküm lia ajuruner.

OLEMSABANG SARASADEM SENTONG KA AYONGZÜKER

Yisu Khrista temeim salem den Küm Tasen salem agütsür. Asenok tongpang tulu tiyongtsü nung noktaka lir. Iba ama tsüngsarusa mapang tamangertemi ola matoki ajem ajema melili aser temenen tongpang anema sarasadem sobutsü sobur raradi. Scotland chubatsür Mary shiba dang 'Bloody Mary' ta onsara majungba agi tenüng jaloktsü, lai-a John Knox sarasadem tsübu. Lai ashi, "Europe sepaitem ajak dang nungibo ni John Knox sarasadem tsübur." Asen sarasadem tashi tulu kümdaktsüba Tamarener Teyanglur Tsüngrem asen den lir. Pa asen den lira, asen anema shiba ali? Anungji arung, temokok agi ali nung tsükiter sarasademdi.

1. Tenüngsang Agütsüba Sarasadem:

- Clean Election Sarasadem Inzü nung shilem agitettsüsa mapang tajung moatsüba asoshi tenüngsang agütsüdi.
- Tsüngrem-i asen Naga nunger dang atasaa aochiba asoshi tenüngsang agütsüdi.
- Alima yipru mopong, menonok, wara tamajung aser iba amala alima yimyai bener arutsuba tamangu lendongtem nungi asen lima kumzüka yutsüba asoshi tenüngsang agütsüdi.
- Asen lima tammang tia nung alidang Yisu Khrista osangtajung yokba asoshi tenüngsang agütsüdi.
- Election mapang tamajunger mapatem sottsü asoshi mapang shitak nung ochishir lenir Rupin Sharma aser ketdangsertem yokba asoshi Tsüngrem nem tenüngsang agütsüdi.

2. Tatok Meshiba Sarasadem:

- Election temenen nangzükti. Election temenen, süpokrem, vote ayokba, temesepba chiyungtsü alemba, tashiyim amshiba, aser azütokshiba mapatem asen Aortemi Naga nunger dang beshia sayu, aser tanga tebenshidak lir. Tsüngrem dang tatok nangzükti.
- Asen kija kibongi menaba aser beshiba temenen nangzükti.
- Putu yimsüsürtem aser lokti lenirtemi election mapang nütsüng nüburtem mashileni aniba asoshi tatok nangzükti.
- Asen Naga nungertemi Tsüngrem jashidaktsüba temenen, ochimashiba temenen, sen benbua Tsüngrem nungi atsüngzüka aoba temenen nangzükti.
- Yisu dak mamangertemi asen Khristan lima menütsütsüsa litetba temenen nangzükti.
- Asen nüburtemi süngyamglu tsüngremtem külemer, Yisu anemer rishikangshir political party pu asema, aser Teyanglur Tsüngrem sensatsüba temenen nangzükti.
- Tsüngrem tenzükertemi tasüita temenen anema mejembiba aser meinyakba asoshi tatok nangzükti.

3. Tsüngrem Teyari Meshiba Sarasadem:

- Arogotemi Clean Election asoshi yimyim ayimba ya asangsang ataloka aotsü Tsüngrem teyari tatenba meshia sarasademdi.
- Candidates aser political workers ajak nem Tsüngrem tsübuba aser tazüokba tanela apuokjang ta sarasademdi.
- Candidate shiai yimsüsüba mendenji Tsüngremi lateta yutsüba temeshi meden ta angatetdakjang ta sarasademdi.
- Shir südir süang ochishir, lokti aser nübur meimba, aser tenzüksü molungsentsü atenbapur, mangdang tejangja akaba lenir atokdakjang ta sarasademdi.
- Nüburtemi süpokrem magitsü aser pei temeten vote sen yong mayoktsü tangatetba shisatsü agüjang ta sarasademdi.
- Polling station ajak nung lendong matoki sünep sünepa agitettsü sarasademdi.
- Election observers, administration, police, polling officials, aser kwika election duty inyakertem lir, parnok shinga lendong majurutsü asoshi sarasademtsüdi.
- Satan-i election mapang tamajung inyaktsü tasa yangluba aser kechisa tamajung mapatem apuoktsüa inyakdar, item ajak Yisu tenüng nung raksajang ta sarasademdi.

4. Tsüngrem nem tenüngsang agüja sarasadem tempangangma. Tsüngrem-i na aser ner kibong moajang.

~ Dimapur Area Ao Baptist Arogo Pastors' Fellowship

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Dimapur nung election aser reshikangshiba Khristantem atema sarasadem



Dimapur, February 19, 2023: Nagaland Baptist Church Council (NBCC)-i Arogotem dang assembly election aser reshikangshiba Khristantem atema sarasademsü ayongzükba ama Amongnü Naga Shopping Arcade (Super market), Dimapur nung sarasadem rally agidang tangokba noksa nung angur. Iba sentong ya Nagaland Joint Christian Forum, Christian Forum Dimapur aser Nagaland Baptist Church Council senteper ayongzük.

Dimapur, Tsüklai/February 19 (TYO): Nagaland Baptist Church Council (NBCC)-i Arogotem dang assembly election aser reshikangshiba Khristantem atema sarasademsü ayongzükba ama Amongnü (February 19) Dimapur nunga Naga Shopping Arcade (Super market) nung sarasadem rally ka ayongzükba agiogo.

"Ozü lima anepjang" omen nung ajemdaker ayongzükba sentong nungji Arogo denomination balala nungi züngsem aikati shilem agia aden.

Sarasadem rally ya Nagaland Joint Christian Forum, Christian Forum Dimapur aser Nagaland Baptist Church Council-i senteper ayongzük.

NJCF-i, "Tang ama kanga

tongtibang mapang ka nung asenoki telemsa adokdaksüba telok nem asenok melungsentsü den masayadaksütsüla. Asenoki election merükteta agitsü atema nangzükter inyakba mapang ka nung asen tensa nungi maangka agitsü merangertem anema asenok kanga kümküma alitsüla," ta metetdaksü.

"Asen yimsü ilatsütsü merangba politics anema asenok kümküma alitsüla. Yimtenren aser tamangba yimsü naji piladaksütsüla. Kati yimsüsüba atema inyaker aser kaji tamangba yimsü indang lir. Asenoki telemsa adokdaksüba politics ajanga nüburtem tsüingda telemsa madokdaksütsüla," ta NJCF-i metetdaksü.

NJCF-i, "February 27 nü

election agiba anogo nung amokmeren kecha makai asenoki vote agütsütsüla. Ajisüaka telemsa adokdaksüba tangatetba agi pusema politics ajanga linük nung tamangba yimsü telok ka rongshitsü merangra ibajibo lendong aketba mera asütsü," ta ashi.

Kasa rally nung India nung reshikangshiba minorities, talisa Khristantem atema sarasademsüba den külemi linük atema, lenirtem, state nung yimtenren lenirtem, loktiliba lenirtem aser election junga agitettsü atema sarasadema liasü.

Christian Forum Dimapur, Advisor Rev. Dr. N Tzudir-i sarasadema iba sentong tenzük aser iba sentong ya Christian Forum Dimapur Chairman, Rev. Moses Murry leniba nung agi.

Los Angeles nung Khristan putir, David O'Connell khaset

February 19, 2023: Los Angeles nung tesüiba küm 40 dak tema nüburtem tenzükba arur Khristan putir ka Honibarnü California nung khaseta lia nguogo.


Los Angeles nung aliba Arogo nung Auxiliary Bishop arrshi küm 69, David O'Connell tasü mangji Hacienda Heights nung aliba ki ka nung angu. Pa tebok temalen injang zübo aika liasü.

Tongti putir, José H. Gomez-i sangdong ka ajanga, O'Connell meimlaba mapang ka nung süadokogo, ta metetdaksü.

Paisa, "Pa (O'Connell) ya yimjung yanglur ka liasü aser pai sensakertem aser tangalen nungi arua jenoka alirtem meima anepalu. Meimchir ajak taküm akhümketa aser kümzüka litettsüsa pai loktiliba yangertsü atema inyak," ta metetdaksü.

"Pa ya medemer tajung ka liasü aser ni pa kanga menungratsü. Ni metet, asenok ajaki pa menungratsü," ta tongti putirisa metetdaksü.

Detectives-i iba tatalokba



David O'Connell

bushisüngdangdar ajisüaka tang tashi nungbo putir khasetba ken o nung melung melemi shinga pua mali.

LASD Homicide Bureau Detective, Michael Modica-i, "Bushisüngdang tang ang tenzükter. Iba tatalokba jangjatsü atema onok teinyaktsü mapa aika lir," ta metetdaksü.

Putir akümba sülen O'Connell-i tesüiba küm 45 tashi Los Angeles nung nüburtem tenzükba aruogo. 2015 küm nung ang Pope Francis-i pa Auxiliary Bishop shima liasü.

David O'Connell ya Ireland nung asoba sülen Dublin nung aliba All Hallows College nung

azüing; iba sülen 1979 küm pa California-i oa liasü.

Pa ordain asüba sülen Los Angeles nung aliba Arogo aika nung pa associate pastor inyak aser Arogo kar nung pastor inyak.

Pai California nung tangalen nungi arua jenoka alir aika yaria aruogo. Pa Interdiocesan Southern California Immigration Task Force nunga chairman liasü aser iba mapang nungji pa lenistüba kübok Central America nungi arua jenoka alir tanur aser kibongtem aika yariogo.

Los Angeles County Board of Supervisors nung chair, Janice Hahn-i, "Bishop O'Connell asüba osang angashia ni kanga jashir. Mapang talangka nungi pa kü tembar liasü. Ni city council nung inyakba mapang aser Supervisor inyakba mapang pa den-a külemi inyaksemogo," ta metetdaksü.

Janice-isa, "Tongti putir Gomez aser Los Angeles nung aliba Arogo züngsemtem den külemi nia pa asüba atema mangyimer," ta metetdaksü.

ANOGO ABEN TSÜNGREM DEN

Nenok Tesangwa

"Yamaji, nisungi nenok mapa tajung ngua, kotak nung aliba nenok Tebu sentsüwangshidaktsütsü asoshi, parnok madang nenok tesangwa jungkai adokdakang."- Matt. 5:16.

Ammang nung tesangwai ayaba nung kecha aibelen mali. Tesangwai tasü itta pa aliba kuli asür aser tashi itta ammagji aridoker. Tsüngremi na Pa tesangwa agi sünga lidaktsüner. Ne taküm nung Pa adenba aser Pa ain aliba ne taküm kuli agi jangja jangjaa nai kuli südaktsüner, idangji na meketa aliba takümtem nung ammag aliba Tsüngrem sentsüwangshi tesangwa jagi aridoktsür.

Aji oda süaka, alimaji tammangba tammangba akümer, ammagji taittsü! Ibaji ammagi kechi inyaktsüla aji inyaker dang. Ammag taneptsüji tesangwaji dang lir. Alimaji tammangba kümra, tebilemstüji ammagji masü. Tebilemstüji tesangwa nungji lir. Yisui Pa nütsüngtemji "alima tesangwa" asütsüla ta ashi (Matt.5:14). Koda tesüngmangtsü mapa- Tsüngremer tesangwa rongnung ka asütsü aser meketa alirtem nung ammag aridoktsüba! Pa arutsü metetdaksüdang. Yisui ashi, "Ammang nung alirtemi sangwa tulu ka angu, aser tasür lima aser tasüba akhüm nung mena alir dangi sangwa adok."

Yisu alimai arutsü memetetba mali asü! Ammag süshidaktsür! Yisu aolen ajak nung tasü itta Tsüngremer ochiba sangdong, aser temenen pur taidok angu. Tebui Pa chir ajanga Pa tesangwa alimai bener arur külen alimaji akhi aliba ama mesüi aküm. Na atema yamaji shitettsü asü? Ne dak aliba tesangwaji külen inyakertemi angur asü? Ner kibong nungi Yisu aliba tesangwaji lokti nem tesangwa agütsür asü? Kodang na ajanga Tsüngremer tesangwaji nenok dangi yokdir aser sangwatsüdir, na meketa aliba ammagji süshitsü.

Laos nung yim ka nungi pastor densema Khristan kibong 15 meindok

February 19, 2023: Buddhist yimsü amanger nütsüng teimba aliba Laos linük nung yimtsüng ka nungi Khristan kibong aika meindokogo; parnoki Khristan yimsü agizükba ajanga yim daklirtemi pastor densema Khristantem meindok, ta International Christian Concern (ICC)-i metetdaksü.

Laos nung Luang Namtha province kübok Mai yim dak Khristantem meindokba sülen sorkar ketdangsertemi iba mangatetteppi bentettsütsü merangdar.

"Luang Namtha province nung Lao Front for National Development office-i iba mangatettep bentettsü atema Khristan kibongtem den yim dak tongti yimsüsür jaoka liasü saka parnoki iba mangatettep bentettsütsü makok," ta osang ka ajanga metetdaksü.

Laos ya Buddhist nütsüng teimba aliba linük ka süaka linük temzüng kübok senso ajaki pei melungba yimsü amangtsü temeden agüja lir.

Ajisüaka atangji nungbo Laos nung Khristantembo 'second-class' sensotem ama züngshir aser lenla aika nung kanga bendangshidanga züngshir.

Laos nung tanga yimsü balala amangertemi Khristantem sendokba dang masü saka Khristantem nem sorkar sentong kübok teyari

balala magütsür.

Laos nung Khristan kati, "Ketdangsertemi sensakertem yaritsü atema nungdak oset aser chiyungtsü balala alitsür, ajisüaka Khristantem nembo Khristan yimsü toktsü nung ang item teyari agütsür," ta metetdaksü.

"Khristan yimsü ya bendanger yimsü, iba yimsü ya anüolen aliba asen tsükchirtem yimsü ta parnoki züngshir, ajisüaka Khristantemibo linük sensotem ya tsükchirtem ama mezüngshir," ta paisa metetdaksü.

Laos nung sorkaribo, linük nung Khristantem reshikangshi masür, ta ashir ajisüaka osangbenertem aser melungtet tebok balalai mapang shia iba linük nung Khristantem reshikangshiba osang sangdonger.

Yaküm October ita nunga Khammouane province nung Evangelical pastor, Sy Seng Manee tepseter lia angu, aser pa mang nung tarak alibaji ajanga pa reshikangshir tepsetba jangja.

Laos ya alima nung Khristantem alitsü linük tamajungtiba 50 rongnung jenjang 26 buba nung lir (2022 World Watch List).

Nütsüng million 7.2 aliba Laos nung Khristan nütsüngbo lakh 2 shi dang lir.

AO OSHI ANGAZÜKDAK: TANÜ ANGAZÜKTSÜBA OJANG



Ozü

(n) tetsüng ana den tashikang adenba shiruru (bird)

* Arem nung **ozü** makhatsüla.

Ozü

(n) o jembiyonga aoba (expression)

* **Ozü** tajung agi jembi dang nisung pelar.

OLONG PAITEP # 6434

	1	2		3	4	5
6					7	
			8	9		
		10				
11						
			12			
13	14	15				16
17					18	

TIPLIN

- Inyaker ajangtelba - (3)
- Bangsemo adokdak - (5)
- Shitak mesüi inyak - (7)
- Ya mimong nung angur - (3)
- Reprangzük - (4)
- Tasola - (5)
- S _ _ _ _ - (4)
- Yagi ajak ashiohtsür - (3)
- Ki aokba oset - (7)
- Ak shi nung inokba tasen - (5)
- Ishika - (3)

LANGTSÜNGLEN

- Meshidak - (3)
- Tanaben soshir - (7)
- Iba anogo - (4)
- Meshi - (3)
- Yagi mi tsükloker - (9)
- Shi tapu ka - (9)
- Yagi ayimer saka ozü masü - (3)
- Ajokba shiruru ka - (7)
- Inyaktet - (4)
- _ _ _ hi - (3)
- Akümlü nungi pilar - (3)

OLONG PAITEP # 6433 TELANGZÜBA

TIPLIN :

- Telok, 4. Aluru, 6. Ozüng, 8. Emk,
- Kin, 10. Teti, 12. Süir, 13. Jen,
- Ola, 16. Talak, 17. Mazük.

LANGTSÜNGLEN :

- Tenükjang, 2. Luden, 3. Kioktsü,
- Lenti, 7. Tajangzük, 11. teronem,
- Sempa, 13. Jahaz.

NAI-A YA METETTER MA

BEYONCÉ-I GRAMMY AWARDS 4 NGUA OTSÜ TASEN YANGLU



Grammy Awards 2023 nung Beyoncé-i Jay-ZBy den külemi sempet aika angu aser iba ajanga Guinness World Records aika yangluogo. Taküm Beyoncé-i Grammy awards pezü angu aser iba ya kija kati teimtiba anguba lir. Tetsür kati Grammy awards teimtiba anguba aser vocalist kati Grammy awards teimtiba anguba otsü tasen Beyoncé-i taküm yanglutetogo. Arishi küm 41 tain Beyoncé-isa tetsürtem rongnung Grammy nominations teimtiba nguteta lir aser ibaji 88 ben lir.

US-i Manipur tourism sector atema 500 million USD agütsütsü

Imphal, February 19, 2023 (Agencies): United States-i Manipur nem 500 US million dollars agütsütsü mulunga agizükogo ta Manipur chief minister N Biren Singh-i ashi.

"US nungi company kati Manipur tourism sector nung 500 US million dollars endoka mapa inyaksü nangzükogo" ta CM Biren-i B20 agiba tesem nung osangbener dang ashi.

Brihostibar aonung Manipur chief minister aser US teshimtet teloktem senden ka amendang iba ya nangzük.

Ano, Argentina aser Peru nungi aruba teshimtet nisungtemia Manipur sorkar dang tetsür health workers yoktsü asüngdangogo, ta CM Biren-isa metetdaksü.

Manipur nungi tetsür nurse aika Japan nung tenangzüktep ka kübok mapa inyakdar, ta paisa ashi.

Argentina nungi aruba teshimtet nisungtemia sports development programs atema tebilembatem lemsatep aser talisa parnoki Manipur nung football asyartem indang jembi, ta N Biren-isa shisem.

CM Biren-i planning portfolio bena lir aser pai ashiba agi par sorkari US investment aser Argentina o Peru-i health workers yoktsüba pelashishia agizükogo.

Manipur nung anogo asemnü B20 session ya 'One Earth, One Family, One Future' omen nung ajemdaker agi. Iba sentong ya Ministry of External Affairs ajanga ayongzük.



OFFICE OF THE
BHARATIYA JANATA PARTY
MOAYIMTI UNIT
30th Alongtaki Mandal

Ref No.

Date: 12/02/2023

To

The President,
Bharatiya Janata Party,
Moayimti Unit (Under 39th Alongtaki A/C)

Sub :

Resignation and declaration

Sir,

We the under mentioned BJP Party workers of Moayimti Unit under 30th Alongtaki A/C have stood firmly with our Hon'ble Minister and party leaders for the last five years.

However, there are many instances of differences in the policies and functioning of the party within the grassroots, we have therefore lost our confidence to work and continue in the party.

Therefore, we the following members unanimously decided to resign both from our position and active membership and declare henceforth.

Sl No	Name	Designation	Signature
1	Limanungsang	Secretary	
2	Imnaakum	Executive	
3	Sangyung	Executive	
4	Lanutoshi	Executive	
5	Sapangsungla	President (Mahila)	
6	Lanuyangla	Secretary (Mahila)	
7	Imtingangla	Executive (Mahila)	

Format C-1

(for candidate to publish in Newspapers, TV)

Declaration about criminal cases

(As per the judgment dated 25th September, 2018, of Hon'ble Supreme Court in WP (Civil) No. 536 of 2011 (Public Interest Foundation & Grs. Vs. Union of India &Anr.)

Name and address of candidate : **A. PANGJUNG JAMIR**

Name of political party : **Bharatiya Janata Party**

(Independent candidates should write "Independent " here)

Name of Election : Nagaland Assembly Election 2023

Name of Constituency : 21-TULI (ST) AC

I, **A. PANGJUNG JAMIR**, a candidate for the above mentioned election, declare for public information the following details about my criminal antecedents :

(A) Pending criminal cases

Sl. No.	Name of Court	Case No. and dated	Status of case(s)	Section(s) of Acts concerned and brief description of offence(s)
1	Special Judge NIA DIMAPUR	CASE NO.: NIA CASE RC 1/2016, RC 01/2016/NIA-GUW Dated 18.08.2016 Chargesheet No. 01/2017	Order of Cognizance against him has stayed by the Hon'ble Kohima bench of the Hon'ble High Court of Guwahati vide order dated 06.08.2018 WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act. (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organisation, raising funds for a terrorist organisation.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).

(B) Details about cases of conviction in criminal offences

NOT APPLICABLE

NOT APPLICABLE

Sl.No. Name of Court & date(s) of order(s)

Description of offence(s) & punishment imposed

Maximum Punishment Imposed

NOT APPLICABLE

NOT APPLICABLE

NOT APPLICABLE

NOT APPLICABLE

Format C-2

(For political party to publish in website, newspapers, TV)

Declaration about criminal antecedents of candidates set up by the party

(As per the judgment dated 25th September, 2018 of Hon'ble Supreme Court in WP(Civil)No. 536 of 2011 (Public Interest Foundation &Grs. Vs. Union of India & Anr.)

Name of Political Party: **BHARATIYA JANATA PARTY**

Name of Election: General Election to the Legislative Assembly of Nagaland, 2023.

Name of State/ UT: **NAGALAND**

1	2.	3.	4.	5			
S I N O	Name Of Constitu ency	Name of Candidate	(A) Pending criminal cases		(B) Details about cases of conviction for criminal offences		
			Name of Court, Case No. & status of the case(s)	Sections of the Acts concerned, brief description of the offence(s) of		Name of the Court & date(s) of order(s)	Description of offence(s) & punishment imposed
1.	21-TULI (ST)	A. PANGJUNG JAMIR	Special Judge NIA DIMAPUR CASE NO.: NIA CASE RC 1/2016. RC 01/2016/NIA-GUW Dated 18.08.2016. Order of Cognizance against him has stayed by the Hon'ble Kohima Bench of the Hon'ble High Court of Guwahati vide order dated 06.08.2018 in WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act. (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organization, raising funds for a terrorist organization.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).	NOT APPLICABLE	NOT APPLICABLE	NOT APPLICABLE

New Zealand nung nisung meyririjang aika samar bushir

Wellington, Tsüklai/

February 19 (Agencies):

New Zealand nung taoba hopta Cyclone Gabrielle agi North Island nung kongshiba sülen nisung 11 asü aser meyririjang aika samar bushir.

Iba cyclone yagi iba asetkong north tsütsü February 12 nü kongshi aser anüdok tzükum leni alua teraksa jenti agütsü.

Ato Kilonser Chris Hipkins-i Gabrielle ya New Zealand nung iba century nung alima yimya teraksa tulutiba, ta ashi.

Kanga sashia kongshiba Hawke's Bay nung cyclone dak sendakba nung nisung tali ana asüba police temi Deobarnü osang agütsü.

Asü-amar tali alitsü, kechiaser nisung 6,400 dak tema samar lir, ta Hipkins-i linük yimtiba, Wellington nungi osangbener dang ashi.

Taküm aliba mashi-koshi kumdaktsüogo aser tanaben shia arutsü mapa tulu lir. Telecommunications nung timtem lir, tajemtsü tzü agi anünger aser tesem karbo tang tashi lenmang raksaba mechi tonga moteter, ta pai ashi.

Supply chains nunga timtem ajurua osettsüset belenba nung timtem adoker, alu raksatsü aser kibong 28,000 nung tang tashi power mali, ta Hipkins-i ashi.

Tesem kar nungbo power yanglutsü hopta aika agütsü aser müreksü iba dang talangba agütsü, ta taoba hopta pai tekumdangtsü shia liasü.

United States aser danga linüktem nungi teyari agütsütsü ashiba mezüingbo magizüki liasü, saka tangbo item teyari agizüker, ta pai ashi.

Mongulbarnü New Zealand-i national state of emergency sangdonga liasü, koba linük puti otsü nung tasembuba alitsü.

Anogo ishika tsüngta Fiji nungi team ka New Zealand bushia arutsü, koba linük 12 nungi teyari agütsütsü ashiba rongnung ka lir, ta PM Hipkins-i ashi. Australia nungi emergency worker 27 arua teyari agütsüba nung yariteper.

Linük nung yimti tulutiba, Auckland anüolen kilometre 60 shi pilar tzükum anasa aliba Muriwai aser Piha tesemtem nung Auckland Council nungi team kati ki raksar aliba arsanga yanglutsü Deobarnü asadanga ao.

Emergency keddangsur aser mitkar temi helicopter amshia nungdakba osettem agütsü.

Osettsüset auyaba osangtem angazükba sülen police temi Hawke's Bay aser anasa aliba Tairawhiti tesemtemi sepai talila 100 yoka lir.

Netherlands sorkari Russia nunger diplomats tem meyipa yok

Amsterdam, Tsüklai/

February 19 (Agencies):

Netherlands-i itangitertem miima anir arutsü meranger ta shia Moscow aitsüba sülen Dutch sorkari ashiba agi, Russia nunger diplomats tem Netherlands toktsü aotsüsa akumtsü.

Netherlands nung International Criminal Court aser global chemical weapons watchdog amala institution tongtipangtem amenoka lir.

Küm ka shi tejakdang Russia-i Ukraine amak tenzükba sülen linük ana tsüngda diplomatic tesendaktep mejungi akum aser Honibarnü iba osang sangdongba sülen ano mepetmesü adokogo.

"Ken o bentettsü atema Netherlands-i aiben merangdangangka Russia-i maneni diplomats tem ama itangitertem Netherlands-i yoktsü meranger," ta Minister of Foreign Affairs Wopke Hoekstra-i ashi.

"Onoki iba inyakyim ya khenyongi inyaktsü memelatsü," ta paisa shisem.

Paisa, taoba mapang dang nungi Russia den tesendaktep tamajungba kumaka tongtepratep merak sai ayutsü atema embassy tem lapoka ayutsü kanga tongtipang, ta ashi.

Moscow nung Russian foreign ministry-i ashiba agi, parnoki iba jenjang agiba anema telangzüba agütsütsü, ta RIA

news agency sangdong ka ajanga metetdaktsü.

Russia nunger diplomats tem dang linük toktsü aotsü atema hopta ana atakzüktsüogo. Kasa mapang nung Amsterdam nung amenoker aliba Russia nunger trade office ka Mongulbarnü tashi nung shibangtsü tetuyuba agütsüogo.

Sorkari ashiba agi, Moscow nung Dutch embassy den mesüktepa Hague nung amenoker aliba Russian embassy nung diplomats tem tajemba kumdaktsütsü.

Netherlands nung itangitertem yoka inyaksangshidaktsütsü atema jenjang agiba atema Russia aitsüba den sorkari ashiba agi, Moscow-i St Petersburg nung aser Russia yimtiba nung amenoka aliba Netherlands indang consulate temi Dutch nunger diplomats tem yoktsü asoshi Moscow-i visa agütsütsü memolunger.

Dutch sorkarisa, parnoki St Petersburg nung amenoka aliba parnok indang consulate shibangtsütsü, ta ashi.

Russia-i Ukraine amak tenzükba sülen mapang tatsüka dang lir Dutch sorkari Russia nunger intelligence officers 17 mintok. Iba sülen Russia-ia kasa telangzüba agüja Dutch nunger diplomats 15 mintoka liasü.

Iba ken o dak sendakba nung Moscow-i tang tashi nung kecha telangzüba agüja mali.

Russia madak takok angutsüla saka mesamatsütsüla: Macron



Munich, Tsüklai/February

19 (Agencies):

Ukraine nung Russia madak takok nguaka samatsüba monguner, ta France Tir Emmanuel Macron-i ashi.

France nunger osangbener den jembidang Macron-i anüolen linüktem dang Kyiv nem mitkar tsütsü teyari tali agütsütsü ajungshi aser mapang talangka raratsü renema lir, ta ashi.

"Ni Ukraine nung Russia madak takok ngudaktsüner, aser ni Ukraine nem par jenjang wazüka lidaktsüner," ta pai ashi.

Ajisüaka pai Russia samatsütsü meranga rara atsülangner ta jembiba aitsü.

Alima nung lenirtem Munich Security Conference nung asenahiba mapang pai iba o ya

jembi, kong Kyiv nem nok-nü tekeraba nung agütsütsü aser Moscow nem tenokdangba tesashiba agütsütsü nangzüktepa liasü.

"Nisung kari bilemba ama asenoki Russia madak takok angutsü nukjidong mayutsüla, par litsü nung Russia nunger mamaktsüla," ta Macron-i Le Journal du Dimanche osangkaket dang ashi.

"Rara repranga atartemi Russia samadaktsüner. France bo kodanga iba jenjang nung meliasü aser kodanga yamaji masütsü."

Munich nung iba mungdang nung Hokulbarnü jembidang tang Moscow den jembitsü mapang masü, ta Macron-i nenshia ashi.

Ajisüaka pai nukjidong tatembo yimjung ken o jembitsü ya lir, ta pai ashi.

Allies temi yaria Ukraine mitkar temi raraba ya kisüngi Russia ya teti asoshi yimjung alitsü atema ken o jebitsü anir marutettsü, ta tiri ashi.

Russia nung yimsüsür melentsü atema nukjidong mali ta pai ashi.

Macron-i iba o jembiaka Ukraine lenirtem asoshi yimjung ken o jembitsü ya tasak lir.

Munich mungdang nung Moscow mejaoktsü telemtetba agiba atema Foreign Minister Dmytro Kuleba-i Hokulbarnü pela agizük.

"Kiralongrar linüki nisung tepset tashi, parnoki bomb, missile aser tank amshi tashi international politics jembitsü Russian lenir mejaoktsüla," ta pai ashi.

Tir Volodymyr Zelenskyy-ia tangsa tangbo Russia Tir Vladimir Putin den jembishinü akatsü meshisem aser telok ana tsüngta temolung lemtepa mali, ta ashi.

Hopta tetenzüklen BBC den sensaksemba mapang paisa Moscow den yimjung tezüngzüktepa yanglutsü asoshi par litsü agütsütsü memolungba shia liasü.

Christian Atsu tasü mang kidangi benerogo



Tsüklai/February 19, 2023 (Agencies): Ghana nung international footballer Christian Atsu shiba Turkey menoknok lendong nung süogo, pa tasü mang Deobarnü kidangi benerogo, ta Ghana foreign ministry-i ashi.

Arishi küm 31 tain Atsu ya February 6 nü 7.8-magnitude tesashi menoknok kati Turkey aser Syria na kongshiba nung densema süogo. Iba lendong nung linük anaprongla senteper nisung 44,000 dak tema süogo.

Mezüngbo taoba Chelsea aser Newcastle United asayar ya menoknok anakba

sülen anogo ka lir kümzükogo ta osang agütsü, ajisüaka iba osang ya tai liasü aser pa tasü mang Honibarnü ngutetogo.

"Pa tasü mang par kinungertem aser Turkey dangi Ghana ambassador-i mina Turkish airlines tayimtsü ka nung arutsü aser Ghana yimtiba Accra Deobar aonung 7:40 nung atongtsü," ta foreign ministry-i metetdaksü.

Honibarnü ministry-i, Atsu ngutetba tesem nung pa teti tambusang aser pa jakrep na densema liasü ta ashi.

Honibarnü Premier League nung Newcastle aser Liverpool na masaya tsüngda

St James' Park, London nung pa nem aküm tetushi agütsüba sentong ka agiba mapang pa kinungtsü aser par tanur asema densema liasü.

Atsu-i Turkey indang Super Lig nung Hatayspor atema goal 33 idaktsür aliba nung tatembangbuba goal ya menoknok agi linük manokshitsü tsüngda February 5 nü idakja liasü.

Pai taoba mapang national team, Black Stars nungi asayaogo aser Ghana tir Nana Akufo-Addo-i ashiba agi, "football asaya ambassador rongnung tajungtiba ka taküm samaogo, koba melentsü tasak asütsü," ta ashi.

Border-Gavaskar Trophy: India-i wicket 6 agi Australia kokogo



New Delhi, Tsüklai/February 19 (Agencies): Arun Jaitley Stadium, Delhi nung India aser Australia na tsüngda tanabuba Test asaya India-i wicket trok agi kokogo. Iba asaya nung Ravindra Jadeja-i ball kanga junga ona India nem takok agütsüogo.

Asaya pezü asayatsü aliba asayamung nung tanabuba test akokba sülen India-i 2-0 agi tejakdang kümogo. India team-i Nagpur nung mezüngbuba Test asaya innings ka aser run 132 agi koker liasü.

Delhi nung takok anguba ya India team-i format ajak nung Australia team 100benbuba akokba liasü.

Tasembuba test asaya ya Holkar Cricket Stadium, Indore nung March 1 nü nungi tenzüka asayatsü. Asaya nung Jadeja-i run 42 agütsür wicket 7 agiba

sülen pa nem Man of the Match naroküm agütsü. Iba test nung pai innings ana senteper wicket 10 agia liasü.

Deobarnü Australia nung batter tem shot selection majungba ajanga mezüngbuba session nung run 113 dang yanglur ajak out süatok aser asaya akoktsü atema India team-i run 115 dang nungdaka liasü.

Australia puri run 52 dang yanglur wicket teku out süatok aser parnok out asüba ya pitch masayatetsüsa asüba agi masü saka süngjemshir masayaba ajanga liasü.

India team atema bowling nung Ravichandran Ashwin-ia (3/59) teyari tulu agütsüogo. Kasa mapang nung Australia nung batter tem rongnungi Travis Head (45) aser Marnus Labuschagne (35) na dak alaka

kati danga run 10 adena meyangluteti liasü.

Asaya akoktsü atema run 115 arishiba mapang KL Rahul-i run 1 dang yanglur out süatok. Nagpur nunga KL-i run 20 dang yanglu aser tanabuba Test nung mezüngbuba innings nung run 12 aser tanabuba innings nung run 1 yanglua liasü.

Captain Rohit Sharma-i boundary ishika züka Delhi indang crowd tem jangrademdakja liasü. Rohit-i (31 off 20 balls) Australia nung spinner temi aoba ball kanga junga azüoka asaya ajisüaka pa run-out süatok. Pai four asem aser six ka züka liasü.

Delhi nungi asayar Virat Kohli-i India nung innings asüngsashitsü merang ajisüaka pa run 20 yanglur aliba mapang Todd Murphy-i out süja liasü. Ball turn asüba junga masadantetba sülen pa wicketkeeper Alex Carey-i stumped sütsü.

Iba Test asaya ya Cheteshwar Pujara atema Test 100buba liasü aser pai out mesüi run 31 yanglu aser asaya akokba boundary pai züka liasü.

Iba asaya akokba sülen India team June ita England nung asayatsü aliba World Test Championship final nung shilem agitsü atema lenmang kanga sadema kümogo.

Asian Championship: India team semifinal nung tsükogo

Tsüklai/February 19, 2023 (Agencies): Badminton Asia Mixed Team Championships nung Honibarnü Dubai Exhibition Centre nung India team-i semifinal asaya nung China team 2-3 agi mekoki asayamung nungi tuguogo.

Semifinal asaya ya India team nung junga asaya metenzüktet aser tebur kija asaya nung HS Prannoy 13-21, 15-21 agi Lei Lanxi-i tsükdakja liasü.

Iba sülen tetsür kija asaya PV Sindhu aser Gao Fangjie na asaya ajisüaka Sindhu-i asaya 9-21, 21-16, 18-21 agi mekoki defending champions team ya 2-0 agi tejakdang aküm.

Ajisüaka tebur tarep asayar

Dhruv Kapila aser Chirag Shetty na aser tetsür tarep asaya Treasa Jolly aser Gayatri Gopichand nungeri pei tata asaya koka score 2-2 aküm.

Decider asayaba mapang tarep temeyoktep asayar Tanisha Crasto aser Ishaan Bhatnagar nati China nung tarep temeyoktep asayar mekoko liasü.

Asaya makokba sülen India team-i bronze medal dang ngutet aser China team South Korea den final asayatsü.

2017 küm iba asayamung tenzüka mapa India team quarter-finals nung tamakok angu aser iba sülen tanabuba aser tesüsa 2019 küm iba asayamung nung group stage dena ajanga masayateti liasü.

Iga Swiatek-i Qatar Open kokogo



Tsüklai/February 19, 2023 (Agencies): World number one Iga Swiatek-i Qatar Open nung la indang title defend süa America tsür Jessica Pegula straight-set nung kokogo.

Poland nungi Grand Slam asemben tashi koker alila yagi Honibarnü Doha nung 6-3 6-0 agi Pegula madak takok ngua liasü.

Tena tsüngda tang tashi nung tenetben asayar lir aser Swiatek-i ponguben aser Pegula-i anaben koka lir.

Hopta tepeyong asayaba mapang arishi küm 21 tain asayar yagi game pongu dang makok aser 2023 küm atema mezüngbuba WTA Tour title ka kokogo. Tang tashi nung lai WTA title 12 koka lir.

Mezüngbuba set nung Swiatek-i 2-0 aser 4-2 aliba mapang Pegula indang service break asü ajisüaka Pegula-ia meyiper la indang serve break süa liasü.

Tanabuba set nung Poland tsürla yagi Pegula indang second serve agizükba mapang points shilem 73 kokteta liasü.

Swiatek, shibai taoba küm Qatar Open final nung Anett Kontaveit straight sets nung

koka liasü, la ya WTA Tour kija asaya title ka defend asüba mezüngbuba asayar lir. Lai Taoba küm May ita-a Italian Open kumanabuba atonga koka liasü.

Taoba küm lai Qatar Open koka asayaba nungi French Open akokba tashi nung asaya 37 atonga koka liasü.

"Season junga asaya metenzükba sülen iba asayamung nung ni kü indang rhythm angu ama bilemer," ta Swiatek-i ashi.

"Iba asayamung ajanga ni kü sasa dak tali temulung lemteta akümstü ta bilemer, saka ni jenjang ka nungi ka ta danga asayayonga oner," ta laisa ashi.

Swiatek, shibai pa indang korang nung Ukraine flag indang sentsü ribbon ka mesüa liasü, lai Ukraine nung pusemba osang ka metetdakja liasü.

"Asenok ajaki kanga kara amatoker ama bilemer, saka asenok ajaki Ukraine aser Ukraine nungertem pusemstüla," ta ashi.

"Tensa memelenshiba ngua kanga tezü atanger ajisüaka parnok ajak tasü ita liyonga aotsü ta amanger," ta Swiatek-i ashi.

BILEMDANGANG

"Ola tashi agi adoka jembibaji tashi ta tebilem."